

## AER PROPÓN UNHA REFORMULACIÓN EN PROFUNDIDADE DO ENTROIDO DE VERÁN DE REDONDELA



Ante a deriva dos últimos anos do Entroido de Verán, tras ter a Agrupación de Electores de Redondela advertido que era imprescindible un cambio de rumbo e ante o caso omiso do goberno local, AER vén de solicitar **a reformulación da festa do Entroido de Verán. Para elo, despois de avaliar as problemáticas reiterativas ano tras ano, AER pon enriba da mesa ata 18 propostas de actuación urxente para que a festa non caia no máis absoluto desprestixio.**

AER está a favor de que en Redondela a veciñanza participe e desenvolva iniciativas festivas e de ocio como é o Entroido de Verán, pero non pode estar a favor do desafortunado evento no que nos últimos anos se foi convertendo este acto festivo, sobre todo a partir de últimas horas da tarde e ao longo da noite.

A Agrupación vén de manifestar que non cre que o éxito do Entroido de Verán se deba cuantificar polo número de asistentes, senón por que toda a veciñanza sexa quen de participar da celebración con seguridade e ambiente festivo respectuoso. Non é aceptable que cada vez se arrincone máis a zona onde os mais cativos poden gozar de actividades, mentres vai crescendo a zona etílico-festiva. A dirección a seguir debera ir camiñando cara a un evento cunha maior calidade cultural e cunha programación “para tódolos públicos”. Por outra banda en Redondela existen diversos exemplos de éxito de eventos festivos onde toda a veciñanza do Concello se volca ano tras ano, sen chegar a acumular a suma de desmáns e despropósitos que se poden observar ao longo da xornada do Entroido de Verán: unha Alameda valada chea de mocidade realizando múltiples botellóns, zonas de tránsito inadecuadas para cativos e persoas maiores podendo levar empuxóns ou presenciar escenas penosas, mexadas en numerosos portais dos edificios da vila, pelexas e conflitos, ruídos desproporcionados ata altas horas da madrugada e mesmo ata o día seguinte, etc.

AER manifesta que o Concello de Redondela debería adoptar medidas reais e prácticas de cara a que o Entroido de Verán deixe de ser considerado por unha parte importante da mocidade como unha festa “macrobotellón” e se converta nunha festa amable, respectuosa e familiar para a veciñanza de Redondela, cun ambiente festivo na liña do popular “Martes de Entroido” do inverno ou o Festival de Títeres, referentes culturais e do ocio en Redondela e comarca.

Entre as medidas propostas destaca o cambio radical de programación, eliminando o concerto da Alameda, substituíndose este por eventos de pequeno formato en prazas e localizacións por toda a Vila. Tamén un aumento das actividades para cativos e cativas e de índole familiar, sobre todo na Alameda para disuadir a formación do típico macrobotellón consentido. Tamén a promoción do evento desincentivando o concepto de macrofesta e a erradicación de calquera indicio de machismo na cartelería asociada. Como non, tamén caben medidas para minimizar o volume de lixo nas rúas e reforzar os medios dos servizos de seguridade e emerxencia locais.

A continuación enumeramos as medidas propostas pola Agrupación para o seu debate no vindeiro pleno municipal:

1. Realizar unha campaña nos medios de comunicación desincentivadora do concepto de “macrofesta” e de “vía libre” ao botellón. Ou sexa, minimizar o efecto chamada pro botellón, mesmo evitando deseños de carteis que centren o atractivo da festa neste senso. Eliminar calquera representación de índole machista na cartelería e difusión do evento.
2. Aumentar as actividades infantís e xuvenís, na liña das que se desenvolven xa na Xunqueira e na Praza da Casa da Torre, engadindo como novo espazo a Alameda de Redondela (desincentivando así que esta sexa un espazo libre atractivo ás concentracións para realizar botellón descontrolado). Deste xeito evitaríase a necesidade de converter un espazo verde nun lugar valado e pechado con control de acceso.
3. Aumentar as actuacións de rúa con charangas, “performances” e actividades culturais (exposicións, proxeccións de fotografías en fachadas de edificios,...) ao longo dos principais vias de Redondela, logrando unha dispersión das persoas asistentes ó Entroido por toda a Vila e animando a que se circule polas rúas; favorecendo paralelamente a economía local tanto de ocio e hostalería ó descentralizar os actos. Manifestar activamente o carácter cultural e festivo respectuoso do evento.
4. Programar actividades ao longo de todo o día, comezando xa pola mañá, continuando como nas últimas edicións polas tardes (talleres de creación de disfraces, talleres de bailes, pinturas de caras, ...) e rematando pola noite pero máis cedo, convertendo o Entroido de verán nunha festa diúrna e non preferentemente nocturna. Tornando a facer unha festa apta para todas as idades achegándose a modelos xa exitosos como o Martes de Entroido ou o Festival de Títeres.
5. Eliminar o gran concerto do aparcadoiro da Alameda, reducindo así o efecto chamada pro botellón, reducindo ademais un orzamento totalmente desorbitado e destinando unha parte destes cartos a desenvolver pequenos concertos ou espectáculos ao longo de tódalas prazas de Redondela (Praza de Pontearreas, Salgueiral, Xunqueira, A Petanca, Casa da Torre, ...). Esta medida axudaría igualmente a evitar a necesidade de converter un espazo verde nun lugar valado e pechado con control de acceso.
6. Elaborar unha campaña para favorecer o control fronte a condutas aditivas principalmente en menores, tanto no referido ao alcol como a outras drogas que se poden chegar a consumir no macrobotellón descontrolado que libremente se deixa que se forme na Alameda de Redondela.
7. Establecer un control rigoroso de venda de alcol a menores así como sobre o seu consumo, procedendo a denunciar a aqueles adultos que faciliten o acceso dos menores ó alcol. Este aspecto debería facerse público explicitamente antes do evento e mesmo no cartel publicitario.
8. Aumento de baños públicos distribuídos nas zonas con máis concentración de asistentes.
9. Aumentar o número de puntos de recollida de residuos e que estes sexan selectivos.
10. Aumento de persoal de servizos de emerxencia, policía local e asesoramento turístico e informativo sobre o desenvolvemento da propia festa.
11. Mellora das dotacións técnicas e materiais dos servizos de emerxencia e de Policía Local que teñen que desenvolver os labores de control, seguridade e asistencia durante o Entroido de Verán.

12. Posicionamento do evento como unha festa libre de comportamentos machistas e desigualdades de xénero. Para isto, proponse a elaboración dunha campaña de visualización dende o CIM a través de carteis ou emblemas, e sinalización de puntos de asistencia en diferentes puntos estratéxicos da vila nesa data.
13. Non realizar a modificación do regulamento de ruídos en exclusiva para o Entroido de Verán, prolongando os horarios de ruídos habituais para poder programar concertos ata altas horas da madrugada. Esta medida favorece que a festa nas rúas dure ata altas horas da madrugada, levando a multiplicar o desafortunado “efecto botellón” e creando se cabe máis molestias a aquela veciñanza que a partir dunha hora prudencial precisa de descanso. Os horarios dos concertos e eventos deberían ser máis cedo para evitar que se prolonguen máis alá das 24:00 h da noite.
14. Coordinación complementándose coa Asociación de Empresarios de Redondela e os locais que programen actos na rúa nesa data, dos horarios e localizacións tanto da programación oficial do Concello coa programación complementaria dos locais. Establecer medidas de axilidade burocrática conxunta que facilite a autorización dos eventos complementarios programados pola hostalaría local.
15. Establecer puntos de adquisición voluntaria dun modelo de vaso reutilizable promocional do Entroido de Verán válido para diferentes edicións do evento e elaborados en material reutilizable ecolóxico. Deste xeito incentivarase a redución da xeración de residuos de plástico mediante a reutilización, minimizarase o uso de vasos de cristal na rúa e terase unha fonte de ingresos adicional para o Concello que axude a financiar o evento.
16. Incentivar e coordinar o uso de transporte público para a chegada e recollida das persoas de fóra de Redondela de cara a evitar aglomeracións a última hora e enfrontamentos polas prazas dos autobuses. Recomendar ás empresas implicadas a venda de billetes de ida e volta deste servizo discrecional con horario de volta aberto.
17. Elaborar un plan de emerxencias global para toda a vila baixo cuxo paraugas se contemplan os actos programados polo Concello e os actos complementarios que enriquecen a festa programados pola hostalería local.
18. Evitar a lectura *a posteriori* da festa saíndo nos medios de comunicación valorando o seu éxito exclusivamente polo número de asistentes, o rendemento económico e expandindo a idea de que o único destacable é un único concerto e a cantidade de espectadores que había. Evitar valorar a festa en termos cuantitativos obviando os cualitativos.

Redondela, 6 de xullo de 2018